

KEPADA ANGGOTA-ANGGOTA IKHWAN...

Di manakah tinggalnya lagi ukhuwah Islamiyyah di negara kita?

Kepada saudara-saudara anggota Ikhwan,

Di dalam hidupnya semangat kebangsaan di sekeliling kita sekarang maka dengan sendirinya hidup di dalamnya semangat-semangat hidup yang semata-mana digantungkan kepada perasaan hidup di atas kebendaan semata – tidak lagi kita memerhatikan masalah bagaimana tepatnya hidup di dalam menyelenggarakan perasaan ukhuwah Islamiyyah di antara kita sesama kita yang tidak diikat oleh rasa kebangsaan yang dilaknat oleh Islam itu.

Kalau kita menyelenggarakan hidup kita di dalam cara hidup kebangsaan maka dengan kerana itu akan terbitlah di dalam masyarakat kita tali pemutus kepada persaudaraan di dalam Islam, akan timbulah di dalam jiwa kita perasaan tidak senang kepada orang lain, dan akan timbulah di dalam dada kita suatu perasaan bahawa kita lebih daripada orang lain walau sekalipun orang lain itu daripada orang-orang Islam sendiri yang hidup mereka, keturunan mereka lebih dahulu daripada kita memeluk agama Islam.

Semangat dan rasa kebangsaan itu dengan sendirinya menimbulkan perkara yang bertentangan dengan tujuan dan maksud pengajaran Islam kerana apabila di sebut bangsa maka timbulah di dalamnya bahawa yang dikatakan bangsa itu tidak

lagi bertali dengan agama dan dengan sendirinya maka persaudaraan di antara umat Islam dengan umat Islam akan putus sebab orang-orang yang memegang semata-mata muslihat kebangsaan lebih utama daripada agamanya akan memandang bahawa walau pun orang itu seagama namun adat resamnya, kebudayaannya dikatakan mereka berlainan pada hal adat resam, kebudayaan dan sebagainya itu bagi Islam tidaklah ia memutuskan pertalian persaudaraan yang dibina oleh Islam.

“Kamu tidak akan dikatakan beriman (kepada Allah dan Rasul-Nya) apabila kamu tidak mengasihi saudara-saudara kamu (dalam seagama) seperti kamu mengasihi diri sendiri” – demikian itulah maksud suatu Hadith.

Mengasihi seorang saudara bagi seorang saudara di dalam Islam banyak digambarkan dengan terangnya oleh sejarah perkembangan Islam. Tatkala diadakan bai‘ah aqabah yang kedua, tatkala orang-orang Ansar bertanya kepada Rasulullah, apakah yang akan di dapat mereka jika mereka mengorbankan segala-galanya untuk Allāh dan Rasul-Nya – dengan ringkasnya Rasulullah menjawab dengan sepatuh kata “syurga”.

Orang-orang Ansār pada masa itu lagi sedikit dan ekonomi mereka lemah sebab mereka baru habis berperang sesama mereka. Tetapi mereka dengan hati yang

terbuka, dengan dada yang luas, menghamparkan kemurahannya, bahkan menerima penderitaan hidup yang pahit jika dipandang dari segi kebendaan apabila sahabat-sahabat Rasulullah berpindah.

Tetapi kerana iman telah mendalam, kerana mereka telah mengasihi saudara-saudaranya seperti mengasihi dirinya sendiri maka kebendaan bukanlah menjadi sebab, kebendaan bukanlah dijadikan alat oleh mereka untuk menerima saudara-saudaranya yang menderita yang tidak dapat menjalankan agamanya di negerinya supaya datang kepada mereka, datang ke tempat mereka. Merka membukakan rumahnya untuk saudara-saudara umat Islam berpindah itu dan memberikan kemurahan yang luar biasa sebab ia telah beriman kepada sabda junjungan kita Muhammad (S.A.W) yang telah mengatakan “tidak beriman seseorang kamu kalau belum mengasihi saudaranya seperti mengasihi dirinya sendiri” itu.

Langkah ini dibuat mereka kerana mereka tahu bahawa rezeki di dalam tangan Allah. Mereka berkeyakinan bahawa tidak ada kekuasaan manusia menentukan hak-hak kebendaannya.

Tidak ada hak manusia menetapkan sesuatu apa yang terjadi kepada seseorang. Apakah ertiinya kemurahan manusia tetapi kemurahan Tuhan lebih-lebih lagi. Tidak akan ada manusia yang papa kerana kemurahannya kepada saudara-saudaranya kalau kemurahan itu dijalankan atau diusahakan mereka dengan kerana Allah. Allah akan membalaskan kemurahan sesiapa jua pun yang berusaha, dan ini dapat kita lihat sendiri beberapa banyak daripada orang-orang yang bukan Islam hidupnya lebih makmur dan mewah kerana kemurahan-kemurahannya kepada umum.

Apakah ini tidak menjadi bukti kepada kita bahawa kalau kita murah hati maka kita akan mendapat balasan yang baik? Apakah kita tidak melihat dan memerhatikan bahawa sebab-sebabnya kelemahan kita kerana kita tidak kuat menunjukkan perasaan ukhuwwah di antara kita sesama kita yang seagama yang tidak dilindungi lagi oleh perasaan kebangsaan – yang menjarakkan di antara kita sesama kita. Tidak ada lagi perantaraan yang menjadi sebab kerana kebudayaan mereka lain, adat resam mereka lain!

Kepada umat Islam yang beriman ia mengerti bahawa Tuhan menjadikan Muhammad Rasulullah, adalah ia tegas berpendirian terhadap kepada kuffar, dan ia berkasih sayang di antara mereka itu (di antara sesama Islam). Mereka itu tegas menegakkan pendiriannya terhadap kepada orang-orang yang bukan Islam dan menunjukkan kasih sayangnya kepada kita sesama kita (umat Islam).

Tetapi keadaan kita sekarang, saudara-saudara anggota Ikhwan, jauh daripada apa yang kita ikuti dari petunjuk Muhammad (S.A.W). Kita takut kelaparan kerana menolong saudara-saudaranya umat Islam yang berharap kepada perlindungan kita seolah-olah mereka lupa bahawa perlindungan daripada Tuhan lebih besar lagi. Kepada saudara-saudaranya yang hendak berlindung dan bernaung dengan saudara-saudaranya, di dalam bilangan yang sedikit orang-orang kita ribut sebagai taufan tetapi terhadap kuffar yang dibawa masuk tidak berhenti-hentinya sepatuh kata kita tidak berkata dan memperkatakannya mengapa?

Apakah perasaan ukhuwwah itu masih ada kepada kita? Soal inilah yang berhajat jawapan daripada saudara-saudara kita sendiri!